

## **MOVIMENTU KONTRA OKUPASAUN TASI TIMOR (MKOTT)**

Díli, 20 Jullu 2018

### **Esteitimentu Públiku Kona-ba Akuzasaun Hasoru “Witness K” no Bernard Collaery husi Governu Australia**

Ho hakfodak boot no triste tebetebes mak iha loron-28 fulan-Juñu, Movimentu Kontra Okupasaun Tasi Timor (MKOTT) simu informasaun katak Advogadu Australianu Bernard Collaery no eis-ofisiál intelijen Australianu ida koñesidu ho naran “Witness K” hetan akuzasaun tanba sira revela katak iha tinan-2004 durante negosiasaun kona ba rekursu natural iha Tasi Timor entre Australia ho Timor-Leste, Governu Australia hala’o operasaun espionajen ida iha Salaun Enkontru Primeiru Ministru Timor-Leste nian.

Buat ida ne’ebé halo hakfodak loos duni tanba akuzasaun hasoru Sr. Bernard Collaery ho Witness K ne’e aprova husi Prokurador Jerál Federal Australia nian Sr. Christian Porter. Ne’e signifika katak Sr. Collaery ho Witness K akuzadu husi Governu Australianu. Ba ema barak iha MKOTT, akuzasaun ida ne’e fó lembra fali sira kona ba akuzasaun hasoru sira barak, sira nia família, belun no maluk sira ne’ebé uluk halo husi Soeharto nia governu durante okupasaun tinan 24 iha Timor-Leste.

Ironia boot ida, ema Timor oan barabarak ne’e hetan akuzasaun nu’udar terrorista husi Soeharto nia governu, no ohin, Sr. Bernard Collaery ho Witness K hetan akuzasaun ho baze ba Lei Anti-Terrorizmu husi Prokurador Jerál Australianu nian, sira nia governu rasik. MKOTT hakfodak tebetebes tanba ohin loron, governu Australia halo átu ida ne’ebé MKOTT hanoin so Ditadór Soeharto de’it mak uluk iha kapasidade atu halo durante ninia ukun.

Governu Australianu hetan eskrutíniu maka’as husi comunidade internasionál wainhira governu Timor-Leste lori kazu espionajen ne’e hasoru Australia ba Tribunal Internasionál de Justisa iha fulan-Janeiru tinan-2014. Nu’udar átu boa fé nian ida, governu Timor-Leste hapara tiha kazu espionajen ne’e iha fulan-Juñu tinan-2015, ne’ebé mak loke dalan ba prosesu konsiliaun atu delimita fronteira maritima permanente entre rai rua ho supervizaun husi Tribunal Permanente de Arbitrajén.

Governu Australia publikamente simu átu ida ne’e no deklara sira nia prontidaun atu negosia fronteira maritima permanente ida ho Timor-Leste ho boa fé. Maibé, akuzasaun hasoru Witness K ho ninia advogadu Sr. Bernard Collaery agora hatudu katak governu Australia momentu ne’ebá simu desizaun hapara kazu ne’e ho má fé ho de’it intensaun atu kore an husi presaan internasionál ne’ebé kazu ida ne’e hamosu.

MKOTT kondena maka’as akuzasaun hasoru advogadu Bernard Collaery ho Witness K, ne’ebé mai ho motivu polítiku, ne’ebé MKOTT konsidera nu’udar ataka ida ne’ebé governu Australia halo ba liberdade espresaun no ba demokrasia. Átu governu Australia nian ida ne’e mós hatudu katak governu Australia sei uza saida de’it atu atinje interese komersiál Australia nian en relasaun ho ninia viziñu sira, maske hahalok ne’e viola lei

internasionál atu hadau sasán husi ninia viziñu ida ne'ebé kiak liu, no sei xoke ka hamonu se de'it ka saida de'it mak hamriik netik iha ninia dalan.

Nu'udar movimentu ida ne'ebé luta ba justisa, direitus umanus, boa viziñansas no respeito ba lei internasionál, MKOTT:

1. Hato'o ninia solidariedade ba Witness K ho nia advogadu Sr. Bernard Collaery iha sira nia luta atu hamosu governu Australia nia konsiénsia katak espionajen ne'ebé sira halo hasoru governu Timor-Leste iha tinan-2004 ne'e la'ós de'it ilegál maibé mós infrasaun ida ba espíritu Australia nian no halo at Australia nia orgullu nu'udar membru comunidade internasionál ida ne'ebé di'ak no responsavel.
2. MKOTT husu ba defensor sira hotu justisa, direitus umanus no lei internasionál iha Australia no Mundu tomak atu unidu hamriik hamutuk iha solidariedade ho Witness K no nia advogadu Bernard Collaery hasoru prosekusaun ida ne'e.
3. MKOTT apresia vontade governu Australia nian hodi rekoñese Povu Timor-Leste nia direitu ba fronteira maritima permanente. Maibé MKOTT nota katak akuzasaun hasoru Witness K ho Bernard Collaery ne'e hahú hafo'er fila fali vontade ida ne'e.
4. MKOTT husu ba governu Australia atu labele kriminaliza Witness K ho nia advogadu Bernard Collaery tanba kriminalizasaun ba sira ne'e ataka ida ba liberdade espresaun no ba demokrasia.
5. MKOTT mós husu ba governu Repúblika Demokrátika Timor-Leste atu konsidera hato'o fila fali kazu espionajen ba Tribunal Internasionál de Justisa se governu Australia kriminaliza Witness K ho nia advogadu Bernard Collaery. Sira na'in rua hetan akuzasaun tanba sira revela operasaun ilegál hasoru governu no povu Timor-Leste iha tinan-2004.
6. MKOTT husu ba governu Australia atu hapara uza aparellu intelijénsia Estadu nian hodi halo espionajen hasoru ninia viziñu sira atu hetan vantajen komersiál, ne'ebé mak klaramente viola lei internasionál.
7. MKOTT hahí no suporta pozisaun Membru Parlamentu Federal Australia nian, Sr. Andrew Wilkie, ne'ebé invoka ninia imunidade parlamentár atu divulga ba públiku informasaun sobre akuzasaun ne'ebé governu Australia halo hasoru Witness K ho Bernard Collaery.
8. MKOTT apresia membru Parlamentu Federal Australia nian; Andrew Wilkie MP, Senador Nick McKim, Senador Rex Patrick no Senador Tim Storer ne'ebé husu ona ba Polísia Federal Australia atu investiga legalidade husi operasaun espionajen ne'ebé Australia halo hasoru governu Timor-Leste iha tinan-2004.
9. MKOTT husu mós ba membru Parlamentu Australia no Senador sira seluk husi partidu polítiku sira hotu, liuliu husi Partidu Trabalhista Australia ne'ebé mak adopta tiha ona política atu respeita lei internasionál relasiona no fronteira maritima ho Timor-Leste, atu uza sira nia imunidade parlamentár hodi divulga informasaun ba públiku kona ba akuzasaun hasoru Witness K ho advogadu Bernard Collaery.